

— Փող չունենք, դեղ չունենք,— շարունակում է բժիշկը,— չունենք տարրական դործիքներ: Դժուար է, դժուար է... Դուք նո՞ր էք եկել:

— Այո՛:

— Ապա ինչո՞ւ եկաք... չգիտե՞լի՞ք...

Ու պատուհանի դէմ անձրեւը լայլիս է: Մօտի սրահներում հիւանդները հառաչում են, ու տառապանքը ման է գալիս կաղալով: Գլուխ ծանր կապարի նման վայր է ընկնում կրծքիս վրայ, աչքերս փակւում են, ու նորից լեռները խառնւում են ուվկիաններին, նորից հիւլէն կայծկլտում է խաւարի մէջ եւ արագօրէն շարժւում:

Մղձաւա՞նջ...

(Շարունակելի)

**ՔԱՌԵԱԿՆԵՐ**

- Քո աչքերի երկնում լոյս ու մութն են մարտնչում,
- Քո շուրթերի արանում նուշ ու նուռն են մեղանչում,
- Քո այտերի ակունքում յոյս-հաւատս են մուշ մընջում:
- Քո տանարի խորքերում սիրտս սէ՛ր է մըրմնջում:

\* \* \*

- Երբոր ջուրն է փարում հողին՝ էլ ի՛նչ անել,
- Ի՛նչ ջահել,
- Երբ որ նուռն է փարում ցօղին՝ էլ ի՛նչ անել,
- Ի՛նչ ջահել,
- Երբ որ մութն է գըրկում լոյսին՝ էլ ի՛նչ անել,
- Ի՛նչ ջահել,
- Երբ որ շուրթն է գըտնում շուրթին՝ էլ ի՛նչ անել,
- Ի՛նչ ջահել:

\* \* \*

- Երբ որ չըկայ լուսին արեւ՝ աստղի շո՛ղն էլ մի բան է.
- Երբ որ չըկայ առատ անձրեւ՝ երկնի ցո՛ղն էլ մի բան է.
- Երբ որ չըկայ գահ ու գանձ՝ դատարկ յո՛յսն էլ մի բան է.
- Երբ որ չըկայ սըրտի սիրած՝ սիրուն կո՛յսն էլ մի բան է:

\* \* \*

Որպէս վըտակ՝ վընիտ, յըստակ ու ջինջ ես,  
Որպէս վըտակ՝ ծաղկոցիս մէջ մընչում ես,  
Որպէս վըտակ՝ միշտ խոխոջում-անցնում ես,  
Որպէս վըտակ՝ որպէս վըտակ քար սի՛րտ ես:

ՀԱՅՄԱՆ

**ՀԻՆ ՊԱՏՄՈՒԹԻՒՆ**

Լաց եղար դու օր մը,  
Երբ ես համբուրեցի քեզ,  
Ու արցունքներդ աղու,  
Ասացիր որ  
Ես երբեք, երբեք չեմ հասկնալու:

Եւ իսկապէս.  
Համբոյր, եւ արցո՞ւնք:

Բայց անցել է անա  
Երկար ժամանակ,  
Եւ դու ինձ համար  
Այլեւս չես այն գիրքը խոր,  
Այն մատեանը փակ:

Իմ յուշերու մէջ հիմա,  
Ես կարդում եմ յստակ՝  
Ճամբան, ուրկէ դու եկար,  
Անցար, եւ գնացիր,  
Սիրած ուրիշին,  
Որ սիրէիր ե՛ւ ինձ,  
Ու ինձանից յետոյ էլ  
Դեռ մէկ ուրիշին:

Ու լաց ես լինում  
Դու այսօր նորէն,  
Երբ ուրիշն է գրկել քեզ,  
Գգում, շոյում, համբուրում,  
Ու արցունքներդ սպիտակ  
Որ թափւում են ցած,  
Նա երբեք, երբեք չի հասկանում:

Եւ իսկապէս.  
Համբոյր, եւ արցո՞ւնք:

Բայց հին պատմութիւն է այս.—  
Սիրում ես մէկին, եւ լալիս ես միւսին: